

***Tarikh Dibaca: 07 APRIL 2017***

# **KHUTBAH JUMAAT**

***Tajuk:***

***“PENCEGAHAN DADAH BERMULA DARI  
RUMAH”***

***\*\*\****

***Terbitan:***

***Unit Khutbah***

***Bahagian Pengurusan Masjid***

***JABATAN AGAMA ISLAM SELANGOR***



## **SENARAI AHLI JAWATANKUASA KHUTBAH NEGERI SELANGOR 2017**

- 1. SS. Dato' Haji Haris Bin Kasim (Pengerusi)**  
**Pengarah Jabatan Agama Islam Selangor**
- 2. SS. Dr. Haji Anhar Bin Haji Opir (Ahli)**  
**Timbalan Mufti, Jabatan Mufti Negeri Selangor**
- 3. Tuan Haji Idris Bin Ramli (Setiausaha)**  
**Ketua Penolong Pengarah, Bahagian Pengurusan Masjid, JAIS**
- 4. Yg. Berbahagia Dr. Haji Osman Bin Haji Sabran (Ahli)**  
**Pensyarah, Universiti Selangor**
- 5. Dato' Haji Abdul Majid Bin Omar (Ahli)**  
**Ahli Jawatankuasa Fatwa Negeri Selangor**
- 6. Tuan Haji Hamid Bin Md Isa (Ahli)**  
**Pensyarah, Kolej Universiti Islam Selangor**
- 7. Tuan Haji Md. Sahari Bin Abdullah (Ahli)**  
**Ahli Jawatankuasa Fatwa Negeri Selangor**
- 8. Tuan Haji Abdul Halem Hapiz Bin Salihin (Ahli)**  
**Ketua Penolong Mufti (Fatwa), Jabatan Mufti Negeri Selangor**
- 9. Ustaz Muhammad Farhan Bin Wijaya (Ahli)**  
**Imam Besar Masjid Sultan Salahuddin Abdul Aziz Shah**
- 10. Ustaz Indera Shahril Bin Mohd Shahid (Ahli)**  
**Pegawai Majlis Agama Islam Selangor**
- 11. Ustaz Hairol Azmi Bin Khairudin (Urusetia)**  
**Penolong Pengarah Unit Khutbah, BPM, JAIS**



## **“PENCEGAHAN DADAH BERMULA DARI RUMAH”**

إِنَّ الْحَمْدَ لِلَّهِ، نَحْمَدُهُ، وَنَسْتَعِينُهُ، وَنَسْتَغْفِرُهُ،  
وَنَعُوذُ بِهِ مِنْ شُرُورِ أَنْفُسِنَا، وَمِنْ سَيِّئَاتِ أَعْمَالِنَا،  
مَنْ يَهْدِهِ اللَّهُ فَلَا مُضِلَّ لَهُ، وَمَنْ يَضِلَّ، فَلَا هَادِيَ  
لَهُ.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ  
أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى  
سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَّا  
بَعْدُ، فَيَا أَيُّهَا الْمُسْلِمُونَ! اتَّقُوا اللَّهَ، أَوْصِيكُمْ وَإِيَّايَ  
بِتَقْوَى اللَّهِ فَقَدْ فَازَ الْمُتَّقُونَ. قَالَ اللَّهُ تَعَالَى: يَا أَيُّهَا  
الَّذِينَ آمَنُوا اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ  
مُسْلِمُونَ.

**Muslimin yang dirahmati Allah sekalian,**

Mimbar ingin mengambil kesempatan pada hari Jumaat yang mulia ini, untuk menyampaikan peringatan agar kita semua dapat meningkatkan keimanan dan ketaqwaan kepada Allah SWT dengan melakukan segala suruhan yang diperintahkan-Nya dengan bersungguh-sungguh dan



meninggalkan segala apa yang dilarang-Nya. Semoga kita mendapat kebahagiaan hidup di dunia dan akhirat.

Mimbar pada hari ini ingin membicarakan khutbah Jumaat yang bertajuk **"PENCEGAHAN DADAH BERMULA DARI RUMAH"**.

**Muslimin yang dirahmati Allah sekalian,**

Kesedaran terhadap kesan buruk dan bahaya penyalahgunaan dadah telah sampai ke tahap yang menyeluruh dalam anggota masyarakat. Namun rasa kebersamaan dalam menunaikan tanggungjawab memerangi musuh negara dan agama ini masih belum menjiwai hati dan nurani rakyat negara ini.

Firman Allah SWT dalam surah al-Tahrim, ayat 6;

يَا أَيُّهَا الَّذِينَ ءَامَنُوا قُوا أَنْفُسَكُمْ وَأَهْلِيكُمْ نَارًا وَقُودُهَا  
النَّاسُ وَالْحِجَارَةُ عَلَيْهَا مَلَائِكَةٌ غِلَاظٌ شِدَادٌ لَا يَعْصُونَ اللَّهَ  
مَا أَمَرَهُمْ وَيَفْعَلُونَ مَا يُؤْمَرُونَ ﴿٦﴾

*"Wahai orang-orang yang beriman, peliharalah diri kamu dan keluarga kamu dari neraka yang bahan-bahan bakarnya adalah manusia dan batu (berhala); neraka itu dijaga dan dikawal oleh para malaikat yang kasar, bengis (layanannya); mereka tidak menderhaka kepada Allah terhadap setiap perkara yang diperintahkan-Nya kepada mereka, dan mereka pula tetap (setia) melaksanakan segala yang diperintahkan".*



Oleh itu menjadi tanggungjawab bagi setiap ibu dan bapa tersebut untuk memastikan anak-anak mereka diasuh dengan penuh kasih sayang dan mendapat didikan yang sempurna serta tidak terpengaruh dengan mana-mana anasir yang boleh membinasa dan merosakkan anak-anak sehingga boleh membawa kepada penagihan yang dimurkai Allah SWT.

### **Hadirin yang dikasihi Allah sekalian,**

Terdapat dua faktor utama yang menjerumuskan anak-anak ke dalam kancah penagihan dadah iaitu faktor keluarga dan pengaruh rakan sebaya. Keluarga atau Ibu dan bapa memainkan peranan yang sangat penting dalam membentuk dan mendidik anak-anak untuk menjadi seorang insan yang sempurna. Oleh yang demikian, peranan untuk mendidik anak-anak adalah bermula sejak mereka kecil. Ini termasuklah tugas pencegahan bagi memastikan anak-anak tidak terjebak kepada penyalahgunaan dadah.

Pemantauan sepenuhnya terhadap segala gerak geri anak-anak perlu sentiasa dilakukan. Ibubapa perlu lebih prihatin dengan perubahan tingkahlaku anak-anak seperti perubahan emosi, iaitu menjadi pemarah, agresif, melawan orang tua atau menjadi terlalu pendiam serta tidak mahu terlibat dengan aktiviti keluarga atau mengasingkan diri. Antara tanda-tanda lain adalah seperti ponteng sekolah, kemorosotan pencapaian akademik, bergaul dengan rakan-rakan yang keciciran sekolah, tidak tidur malam, balik rumah lewat dan sering meminta duit berlebihan setiap hari.

Kegagalan ibu bapa untuk memantau perkembangan dan perubahan tingkahlaku anak-anak akan menyebabkan anak-anak mudah terjebak di dalam aktiviti yang tidak bermoral termasuklah ke kancah penyalahgunaan dadah.



Selain itu, krisis rumah tangga antara ibu dan bapa juga merupakan faktor penyumbang kepada masalah tersebut. Ia memberikan kesan yang mendalam ke dalam diri anak-anak yang masih memerlukan perhatian dan kasih sayang ibu bapa. Anak-anak akan cuba mengambil jalan yang salah sebagai satu cara untuk melepaskan tekanan perasaan atau mengendalikan gangguan emosi mereka. Di dalam keadaan ini pengaruh rakan sebaya lebih kuat daripada pengaruh ibu bapa. Sehingga anak-anak lebih mempercayai kawan-kawan mereka berbanding dengan ibu dan bapa. Mereka tidak dapat membezakan perkara yang baik dan buruk. Akhirnya mereka tewas sehingga melakukan perkara-perkara yang salah di sisi undang-undang dan yang paling mendukacitakan perkara-perkara tersebut juga dimurkai oleh Allah taala.

### **Para tetamu Allah sekalian,**

Menyedari hakikat ini, maka mimbar Jumaat pada hari ini ingin menekankan beberapa langkah pencegahan yang mesti dilaksanakan oleh ibu bapa bagi mengelakkan anak-anak daripada terlibat dengan penyalahgunaan dadah.

Pertama: ibu bapa hendaklah memberikan didikan agama yang sempurna kepada anak-anak.

Setiap anak mesti diberikan didikan agama yang sempurna. Menjadi tanggungjawab ibu dan bapa untuk memastikan anak-anak mereka mendapat didikan tersebut dan mendidik mereka semenjak kecil lagi. Anak-anak yang tidak dididik dengan agama yang sempurna tidak dapat membezakan antara perbuatan yang baik dan salah. Didikan agama yang mencukupi akan menjadi benteng yang paling kuat sehingga dapat



menghindarkan diri daripada gejala tidak sihat termasuklah ke kancah penagihan dadah.

Oleh itu, proses pentarbiahan anak-anak tentang nilai-nilai agama perlu dimulakan sejak di rumah. Apabila anak-anak telah mendapat ajaran agama dengan baik dan mengaplikasinya di dalam aktiviti seharian, sudah pastilah mereka dapat mengawal diri daripada perkara negatif termasuk masalah penyalahgunaan dadah. Hal yang demikian kerana, perasaan sangat takut kepada Allah akan mencegah naluri anak-anak daripada mendekati dadah atau bahan-bahan mengahayakan yang lain seperti gam, air ketum dan arak. Anak-anak dapat membezakan perlakuan yang murni dan tidak bermoral.

Oleh itu pemantauan dan pentarbiahan yang berterusan oleh ibu bapa terhadap pengamalan agama anak-anak akan membentuk satu benteng yang kukuh bagi menepis pengaruh penagihan dadah kepada anak-anak. Ibu bapa mesti bertanggungjawab untuk memastikan anak-anak mereka dapat melaksanakan ibadat kepada Allah seperti solat lima waktu dengan sempurna.

Sebuah hadis daripada Amru Bin Syuaib, daripada ayahnya, adripada datuknya R.Anhum berkata bahawa Nabi Muhammad SAW menyuruh kita ajar anak solat sejak dari umur 7 tahun dan pukul kalau tidak solat bila umur 10 tahun.

مُرُوا أَوْلَادَكُمْ بِالصَّلَاةِ وَهُمْ أَبْنَاءُ سَبْعِ سِنِينَ  
وَاضْرِبُوهُمْ عَلَيْهَا وَهُمْ أَبْنَاءُ عَشْرِ سِنِينَ، وَفَرِّقُوا  
بَيْنَهُمْ فِي الْمَضَاجِعِ.



*“Perintahlah anak-anak kamu supaya mendirikan sembahyang ketika berusia tujuh tahun dan pukullah mereka kerana meninggalkan sembahyang ketika berumur sepuluh tahun dan asingkanlah tempat tidur di antara mereka (lelaki dan perempuan)”.*

*(Hadis riwayat Abu Daud).*

### **Hadirin yang dikasihi Allah sekalian,**

Kedua: Ibu bapa hendaklah menjalinkan hubungan kekeluargaan yang erat dengan anak-anak.

Hubungan yang baik atau jalinan yang erat antara ahli keluarga perlulah sentiasa disemai dengan kasih sayang agar anak-anak mendapat sepenuh perhatian daripada ibu bapa. Dengan demikian Ibu bapa dapat memantau segala tindak tanduk anak dari semasa ke semasa. Ini dapat mencegah anak-anak daripada terlibat dengan perkara-perkara negatif termasuk penyalahgunaan dadah.

Ibu bapa hendaklah menjadi ‘rakan’ terbaik kepada anak-anak. Ibu bapa hendaklah sanggup duduk bersama-sama dan mendengar luahan perasaan mereka. Adalah digalakkan agar ibu bapa bermain dengan anak-anak yang masih kecil kerana perlakuan ini amat penting dalam perkembangan mental dan emosi anak-anak dan ia dapat mewujudkan hubungan yang erat dalam keluarga. Apabila anak-anak melakukan kesalahan, maka Ibu bapa hendaklah menegur mereka agar mereka tahu apa yang baik dan apa yang salah. Asuhlah anak-anak seperti kata pepatah melayu “melentur buluh biarlah dari rebungunya” kerana apabila sudah menjadi buluh, ia sudah terlewat.

Sesungguhnya tanggungjawab membentuk dan mendidik anak-anak bukan suatu kerja yang mudah dan singkat tetapi ia memerlukan masa,





perhatian dan kesabaran ibu bapa dalam memastikan anak-anak menjadi insan yang sempurna dan terhindar daripada segala perbuatan yang dimurkai Allah .

Allah SWT berfirman dalam surah al-Syuara', ayat 214:



*"Dan berilah peringatan serta amaran kepada kaum kerabatmu yang dekat".*

**Tetamu Jumaat sekalian,**

Ketiga: Ibu bapa hendaklah sentiasa mengawasi tingkah laku dan mengenali rakan anak-anak.

Ibu bapa hendaklah mengambil berat setiap perkembangan atau perubahan anak-anak. Ibu bapa yang prihatin akan melakukan pemeriksaan bilik dan barang-barang pribadi anak-anak dari semasa ke semasa bagi memastikan tiada barang-barang yang terlarang berada dalam simpanan anak-anak mereka. Pencegahan awal sangat membantu ibu bapa untuk mengesan segala aktiviti-aktiviti anak-anak mereka termasuk merokok dan pergaulan bebas.

Selain itu, ibu bapa perlu mengetahui dengan siapa anak-anak mereka berkawan. Sama ada sewaktu di sekolah mahupun sewaktu di luar persekolahan. Kebijaksanaan ibu bapa untuk mendapatkan maklumat sama ada dengan cara bertanya sendiri dengan anak-anak aktiviti harian mereka atau dengan cara bertanya daripada orang lain yang rapat dengan mereka. Secara tak langsung, ibu bapa dapat menilai kedua-dua maklumat dan dapat



bertindak lebih awal jika mengesyaki sesuatu yang tidak baik berlaku kepada anak-anak.

### **Muslimin yang dirahmati Allah sekalian,**

Keempat: Ibu bapa hendaklah sentiasa berdoa agar anak-anak sentiasa terpelihara dan dilindungi Allah SWT serta dijauhkan dari pelbagai keburukan.

Doa adalah senjata bagi orang-orang Islam. Oleh yang demikian, menjadi tanggungjawab Ibu bapa supaya sentiasa mendoakan segala kebaikan untuk anak-anak dengan doa yang sering dibaca iaitu;

... رَبَّنَا هَبْ لَنَا مِنْ أَزْوَاجِنَا وَذُرِّيَّتِنَا قُرَّةَ أَعْيُنٍ  
وَأَجْعَلْنَا لِلْمُتَّقِينَ إِمَامًا

*"Wahai Tuhan kami, anugerahkanlah kepada kami isteri-isteri kami dan keturunan kami sebagai penyenang hati (kami), dan jadikanlah kami ikutan bagi orang-orang yang bertakwa".*

### **Hadirin sekalian,**

Mengakhiri khutbah pada kali ini, kesimpulan yang boleh diambil daripada khutbah yang telah disampaikan tadi adalah:-

1. Umat Islam hendaklah meyakini bahawa tanggungjawab mendidik anak-anak adalah tuntutan agama.
2. Ibu bapa hendaklah memastikan anak-anak mendapat didikan agama yang sempurna dan akidah yang kukuh sebagai benteng pertahanan



diri daripada terlibat dengan aktiviti-aktiviti yang tidak sihat dan dimurkai Allah SWT.

3. Ibu bapa hendaklah memastikan anak-anak tidak terjebak dengan penyalahgunaan dadah dan tanggungjawab ini hendaklah dipikul oleh semua pihak.

4. Ibu bapa hendaklah peka dengan setiap tingkah laku dan perubahan sikap anak-anak sama ada diumah ataupun di luar rumah..

أَعُوذُ بِاللَّهِ مِنَ الشَّيْطَانِ الرَّجِيمِ  
إِنَّمَا أَمْوَالُكُمْ وَأَوْلَادُكُمْ فِتْنَةٌ وَاللَّهُ عِنْدَهُ أَجْرٌ عَظِيمٌ ﴿١٥﴾

"Sesungguhnya harta benda kamu dan anak-anak kamu itu hanyalah menjadi ujian, dan disisi Allah jualah pahala yang besar".

(at-Taghabun ; 15).

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي  
وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلْ  
مَنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ الْعَلِيمُ.  
أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ  
وَلِسَائِرِ الْمُسْلِمِينَ وَالْمُسْلِمَاتِ، فَاسْتَغْفِرُوهُ إِنَّهُ هُوَ  
الْغَفُورُ الرَّحِيمُ.



## KHUTBAH KEDUA

الْحَمْدُ لِلَّهِ الَّذِي جَعَلَنَا مِنَ الْمُسْلِمِينَ، وَرَزَقَنَا مِنَ  
الطَّيِّبَاتِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ  
لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اَللّٰهُمَّ صَلِّ  
وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ  
وَصَحْبِهِ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ. أَمَّا  
بَعْدُ، فَيَا عِبَادَ اللَّهِ، اتَّقُوا اللَّهَ، أُوصِيكُمْ وَإِيَّايَ  
بِتَقْوَى اللَّهِ فَقَدْ فَازَ الْمُتَّقُونَ.

**Sidang Jumaat yang dirahmati Allah SWT,**

Mimbar Jumaat sekali lagi berpesan supaya kita sentiasa bertakwa kepada Allah SWT dan menyedari bahawa Islam mengajar kita supaya bersikap sederhana dalam segala amalan. Kita amatlah dituntut agar menampilkan kemuliaan akhlak, sikap dan keperibadian tinggi kerana Rasulullah SAW diutus untuk menyempurnakan akhlak dan sebagai rahmat bagi seluruh umat dan sekalian alam.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ آمَنُوا  
صَلُّوا عَلَيْهِ وَسَلِّمُوا تَسْلِيمًا.



اَللّٰهُمَّ صَلِّ وَسَلِّمْ عَلٰى سَيِّدِنَا وَمَوْلَانَا مُحَمَّدٍ سَيِّدِ  
الرُّسُلَيْنِ وَارْضَ اللّٰهُمَّ عَنْ اَصْحَابِهِ وَقَرَابَتِهِ وَأَزْوَاجِهِ  
وَذُرِّيَّاتِهِ أَجْمَعِينَ.

اَللّٰهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ  
وَالْمُؤْمِنَاتِ الْاَحْيَاءِ مِنْهُمْ وَالْأَمْوَاتِ، إِنَّكَ سَمِيعٌ قَرِيبٌ  
مُّجِيبُ الدَّعَوَاتِ وَيَا قَاضِيَ الْحَاجَاتِ. اَللّٰهُمَّ اِنَّا  
نَسْأَلُكَ وَنَتَوَسَّلُ اِلَيْكَ بِنَبِيِّكَ الْاَمِينِ، وَنَسْأَلُكَ  
بِاسْمَائِكَ الْحُسْنٰى وَصِفَاتِكَ الْعُظْمٰى اَنْ تَحْفَظَ  
بِعَيْنِ عِنَايَتِكَ الرَّبَّانِيَّةَ وَبِحِفْظِ وَقَايَتِكَ الصِّمْدَانِيَّةَ،  
جَلَالَةَ مَلِكِنَا الْمُعْظَمِ سُلْطَانَ سَلَاطُور، سُلْطَانَ  
شَرَفُ الدِّينِ اَدْرِيسِ شَاهِ الْحَاجِ ابْنِ الْمَرْحُومِ  
سُلْطَانَ صَلَاحُ الدِّينِ عَبْدِ الْعَزِيزِ شَاهِ الْحَاجِ. اَللّٰهُمَّ  
اَدِمِ الْعَوْنَ وَالْهِدَايَةَ وَالتَّوْفِيقَ، وَالصِّحَّةَ وَالسَّلَامَةَ  
مِنْكَ، لَوْلِيَّ عَهْدِ سَلَاطُور، تَغْكُو أَمِيرِ شَاهِ ابْنِ  
السُّلْطَانَ شَرَفُ الدِّينِ اَدْرِيسِ شَاهِ الْحَاجِ فِي أَمْنٍ



وَصَلِّحْ وَعَافِيَةٍ بِمَنْكَ وَكَرَمِكَ يَا ذَا الْجَلَالِ وَالْإِكْرَامِ.  
اللَّهُمَّ أَطْلُ عُمْرَهُمَا مُصْلِحِينَ لِلْمُوظَّفِينَ وَالرَّعِيَّةِ  
وَالْبِلَادِ، وَبَلِّغْ مَقَاصِدَهُمَا لِطَرِيقِ الْهُدَى وَالرَّشَادِ.

Ya Allah, Engkaulah Tuhan yang Maha berkuasa, kami bersyukur kehadiran-Mu yang telah mengurniakan kami rahmat dan nikmat, sehingga kami dapat meneruskan usaha ke arah memperkukuhkan negara umat Islam khususnya negeri Selangor, sebagai negeri yang maju, sejahtera dan berkebakikan dibawah naungan dan pimpinan raja kami sebagai ketua agama Islam di negeri ini.

Justeru kami pohon kehadiran-Mu ya Allah, tetapkanlah iman dan pegangan kami kepada Ahli Sunnah Wal-Jamaah. Peliharalah kami daripada akidah yang menyeleweng dan sesat seperti Syiah, Qadyani serta lain-lain. Kukuhkanlah ya Allah perpaduan kami, luaskanlah rezeki kami, kayakanlah kami dengan ilmu yang bermanfaat, suburkanlah jiwa kami dengan budi pekerti yang mulia, lindungilah kami daripada bala bencana dan wabak penyakit khususnya wabak penyakit ayam H5N1 (H Five N One). Kami pohon ya Allah agar wabak ini tidak merebak ke negeri kami Negeri Selangor Darul Ehsan, Allahumma Amin!

رَبَّنَا هَبْ لَنَا مِنْ أَزْوَاجِنَا وَذُرِّيَّتِنَا قُرَّةَ أَعْيُنٍ  
وَأَجْعَلْنَا لِلْمُتَّقِينَ إِمَامًا. رَبَّنَا ءَاتِنَا فِي الدُّنْيَا حَسَنَةً  
وَفِي الْآخِرَةِ حَسَنَةً وَقِنَا عَذَابَ النَّارِ.



عِبَادَ اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايِ  
ذِي الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ  
وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿٩﴾

فَاذْكُرُوا اللَّهَ الْعَظِيمَ يَذْكُرْكُمْ وَاشْكُرُواهُ عَلَىٰ نِعَمِهِ  
يَزِدْكُمْ، وَاسْأَلُوهُ مِنْ فَضْلِهِ يُعْطِيكُمْ وَلَذِكْرُ اللَّهِ  
أَكْبَرُ وَاللَّهُ يَعْلَمُ مَا تَصْنَعُونَ.

\*\*\*\*\*